

Mormonandgay.lds.org-оос авав.

Бурхан бүх хүүхдэдээ хайртай

Биднийг үхлийг даван туулж, мөнх амьдралтай болоосой гэсэндээ Өөрийн Хүүг золиослол болгон өгсөн Бурханы хайрын хэр хэмжээ, цар хүрээг үүнээс өөрөөр илүү бүрэн дүүрэн харуулах зүйл үгүй билээ. “Бурхан ертөнцийг үнэхээр хайрласан тул цорын ганц Хүүгээ өгсөн. Ингэснээр Хүүд итгэгч хэн ч мөхөхгүй, харин мөнх амьтай болох юм” (Иохан 3:16). Хүн төрөлхтний нүглийг цагаатгах, бүх л зовлон шаналал, шударга бус зүйлийн төлөөсийг төлөх, бүх хүний өмнөөс үхлийн хүлээсийг тайлж болохын тулд амиа өгсөн Есүс Христийн хайрыг үүнээс илүү илэрхийлэх зүйл огт үгүй (Алма 7:11–13-ыг үзнэ үү). “Нөхдийнхөө төлөө амиа зориулахаас өөр агуу хайр байхгүй” (Иохан 15:13).

2009 оны 10-р сарын Ерөнхий чуулган дээр ерөнхийлөгч Дийтр Ф.Угдорф Бурханы хайрыг дүрслэхдээ:

“Бурхан хүний гадаад байдлыг хардаггүй. Бид харшид амьдардаг уу эсвэл нэг давхар жижиг байшинд амьдардаг уу, мөн царайлаг уу, царай муутай юу, нэрд гарсан уу эсвэл хэн ч мэдэхгүй мартагдсан нэгэн үү гэдэг нь Түүнд огт хамаагүй байдаг гэдэгт би итгэдэг. Бид дутагдалтай хэдий ч Тэрээр биднийг бүрэн дүүрэн хайрладаг. Бид хэдий төгс биш ч Тэрээр биднийг төгс хайрладаг. Бид өөрсдийгөө зүг чиг заагчгүй, хаягдсан хүмүүс гэж бодож болох ч Бурханы хайр биднийг бүрэн дүүрэн өлгийдөн авсан байдаг.

Тэрээр хэмжээлшгүй цэвэр, ариун нандин, дүрслэхийн аргагүй хайраар бялхан байдаг учраас биднийг хайрладаг. Бид түүх намтрынхаа улмаас Бурханд чухал байгаа юм биш. Харин бид Түүний хүүхдүүд учраас Түүнд чухал байгаа юм. Тэрээр бидний хүн нэг бүрийг хайрладаг” гэжээ (“Бурханы хайр,” 2009 оны 10-р сарын Ерөнхий чуулган).

Бурхан бид бүгдэд хайртай. Тэр өөр итгэл үнэмшилтэй мөн шашин шүтлэггүй хүмүүсийг ч хайрладаг. Тэр зовж зүдэрсэн хүмүүсийг төдийгүй баян, ядуу гэж ялгалгүй бүх хүнийг хайрладаг. Тэр бүх үндэстэнг, ямар ч соёл заншилтай мөн гэрлэсэн эсвэл ганц бие хүмүүсийг мөн ижил хүйстэндээ татагддаг буюу гомо, лесби эсвэл бисексуал хэмээх тодотголтой хүмүүсийг ч бас хайрладаг. Тэрээр биднээс Өөрийнх нь үлгэр жишээг дагаасай хэмээн хүсдэг.

Бидэнд Бурханыг болон бие биенээ хайрлах зарлигийг өгсөн

““Чи бүх зүрх, бүх сэтгэл, бүх оюунаараа өөрийн Бурхан Эзэнээ хайрла. Энэ бол агуу нь бөгөөд хамгийн чухал тушаал мөн. Удаах нь “Чи хөршөө өөрийн адил хайрла” гэсэнтэй адил юм” (Матай 22:37–39).

“Би та нарыг яаж хайрласан шиг та нар бие биеэ хайрлагтун. Энэ бол Миний тушаал” (Иохан 15:12).

Бид Бурханы зарлигуудыг сахиж (Иохан 14:15-ыг үзнэ үү) мөн бие биенээ хайрласнаар Түүнийг хайрлах хайраа харуулдаг (Иохан 13:34-ийг үзнэ үү). Хэрэв таны гэр бүлийн гишүүн эсвэл найз ижил хүйстэндээ татагддаг буюу өөрсдийгөө гомо гэж үздэг бол тэднийг хайрла. Ерөнхийлөгч Хэнри Б.Айринг

“Та нар дотно байсан боловч хол байгаа хэн нэгэнтэй ойр байхыг хүсвэл юу хийх ёстойгоо мэднэ. Та нар тэдэнтэй ярилцах арга замыг олж, тэднийг сонсож мөн нэг нэгнийхээ төлөө ямар нэг зүйл хийх арга замуудыг эрж хайх болно. Энэ харилцаа хэр олон давтагдаж, хэр удаан үргэлжилнэ, та нарын хоорондын харилцаа төдий чинээ гүн гүнзгий байх болно. Хэрэв ярилцахгүй, сонсохгүй мөн хийх зүйлүүдээ хийхгүй удвал харилцаа сулрах болно. Бурхан бол төгс төгөлдөр, бүхнийг мэдэгч, харин та бид мөнх бус юм. Гэвч тэр бол бидний Эцэг бөгөөд биднийг хайрладаг төдийгүй сайн найзын адилаар өөрт нь ойртох боломжийг бидэнд олгодог. Та нар ч бас адил арга замаар буюу ярилцаж, сонсож мөн үйлдсэнээр үүнийг хийх болно” (“To Draw Closer to God,” 1991 оны 4-р сарын Ерөнхий чуулган).

Та нар бусдыг хайрлаж, тэдэнд үйлчилснээр Бурханыг хайрладаг гэдгээ харуулдаг. “Мөн болгоогтун, би та нарт эдгээр зүйлийг та нар мэргэн ухааныг сурч болохын тулд хэллээ; та нар бусдадаа үйлчилж байгаа нь та нар зөвхөн Бурхандаа үйлчилж байгаа гэдгээ мэдэж болохын тулд буюу” (Мозая 2:17).

Бие биенээ хайрлах гэдэг нь юу гэсэн үг вэ? Хайр санаа тавьдаг. Хайр сонсдог. Хайр энэрэнгүй. Хайр урам зориг өгдөг. Хайр нь хүний хамгийн эрхэм дээд чанар юм. Учир нь бид Бурханы хүүхдүүд бөгөөд “Бурхан бол хайр билээ” (1 Иохан 4:8). Сүүлчийн зоог дээрээ Аврагч “Хэрэв та нар бие биеэ хайрлах юм бол үүгээр чинь бүх хүн та нарыг Миний шавь нар мөн гэдгийг мэдэх болно” (Иохан 13:35) хэмээн хэлсэн.

Бие биенээ хайрлах зарлиг нь биднээс өөр үзэл бодолтой хүмүүсийг ч хайрлахыг багтаадаг. Ахлагч Даллин Х.Өүкс

“Бид амьдралд тохиолдох олон төрлийн харилцаа холбоо, нөхцөл байдалдаа дасан зохицож амьдрах ёстой. Хэдийгээр үзэл бодлын зөрчил гарсан ч бид амин чухал эрхэм нандин зүйлсээсээ татгалзаж, орхихгүй байх ёстой бөгөөд Христийг дагалдагч бидний хувьд эрхэмлэдэг зүйлсийг маань хуваалцдаггүй, мөн тэдгээрийн суурь сургаалыг хүлээн зөвшөөрөхгүй байгаа хүмүүстэй энх тайван байдлаар зэрэгцэн амьдарч сурах хэрэгтэй. Бид бошиглолын илчлэлтээр мэдэж авдаг Эцэгийн авралын төлөвлөгөөний дагуу Түүний тушаалуудыг дагаж амьдарвал зохих газарт мөнх бус амьдралаар амьдарч байна. Тэрээр биднийг хайрладаг байсан шиг өөр соёл, шашин шүтлэгтэй хөршүүдээ хайрлах нь ч мөн энэхүү тушаалуудад ордог. Мормоны Номны нэгэн бошиглогчийн зааснаар бид “Бурханыг болон бүх хүмүүнийг хайрлах хайрыг агуулан урагш тэмүүлэх ёстой” хэмээн тайлбарласан (2 Нифай 31:20)” (“Бусдыг хайрлаж, өөр үзэл бодол бүхий хүмүүстэй зэрэгцэн амьдрах нь,” 2014 оны 10-р сарын Ерөнхий чуулган).

Бурханы хайр нүглийг зөвтгөдөггүй. “Учир нь Их Эзэн бибээр нүглийг өчүүхэн төдий ч хүлцэн тэвчиж чадахгүй. Гэсэн ч наманчилж, Их Эзэний зарлигуудыг биелүүлдэг хүн уучлагдах болно” (С ба Г 1:31–32). Үүний нэгэн адил бид Бурханы зарлигуудыг дагаж, өмгөөлж хамгаалахдаа өчүүхэн төдий ч буулт хийх ёсгүй боловч Бурханы хэрхэн хайрладгийг бүхий л байдлаараа даган дуурайж, нэг ч хүнд гадуурхагдсан, ганцаардсан эсвэл найдвараа алдсан гэсэн мэдрэмж төрүүлэхгүйн тулд бие биенээ нээлттэй болоод бүрэн дүүрэн хайрлах ёстой.

Аврагч бидний бүх бэрхшээлийг төгс ойлгодог

“Учир нь бид одоо толинд бүдэг бадаг хардаг ч, харин дараа нь нүүр нүүрээ харна. Би одоо хэсэгхэнийг мэддэг ч, би өөрөө бүрэн мэдэгдсэн шигээ харин дараа нь би бүрэн мэдэх болно” (1 Коринт 13:12).

Мөнх бус хүмүүс бидний ойлголт хязгаарлагдмал. Бид Нифайтай хамт “Тэрбээр хүүхдүүддээ хайртайг нь би мэднэ; тийм боловч бүх зүйлүүдийн утгыг мэдэх нь үгүй би” (1 Нифай 11:17) хэмээн тунхаглаж чадна.

Бид хувийн амьдралдаа хариулт, удирдамж эрэлхийлэх үедээ Бурханд, Есүс Христийн цагаатгагч золиослолд буй хүчинд найдаж болно. Есүс Христ дэлхийн нүглүүдийг өөр дээрээ авч, хүн төрөлхтний мэдэрч болох бүх л өвчин шаналал, зүдгүүрийг үүрсэн.

“Мөн тэрээр бүх төрлийн өвчин мөн зүдгүүрүүд мөн уруу таталтуудыг тэвчих болно; мөн энэ нь тэр өөрийн хүмүүсийн шаналал мөн өвчнүүдийг өөр дээрээ авах болно гэсэн тэрхүү үг биелэгдэж болохын тулд бөлгөө” (Алма 7:11).

Ижил хүйстэндээ татагдах мэдрэмжийг мэдрэх нь нүгэл биш бөгөөд бид хэрхэн хариу үйлдэл үзүүлэхээ сонгож чадна

Ижил хүйстэндээ татагдах мэдрэмжийг төрүүлдэг учир шалтгааны тухайд Сүм аливаа байр суурь баримталдаггүй. 2006 онд ахлагч Даллин Х.Өүкс

“Ижил хүйстэндээ сэтгэл татагдахтай холбоотой асуудлуудыг хамруулаад эдгээр эмзэг байдал эсвэл дур хүслээс болж үүссэн ямар ч зүйл дээр Сүмд байр суурь байхгүй” хэмээн тайлбарлажээ (2006 онд ахлагч Даллин Х.Өүкс, Ланс Б.Викмэн нартай хийсэн ярилцлага: “Ижил хүйстэндээ сэтгэл татагдах нь”).

Ижил хүйстэндээ татагдах мэдрэмжийг мэдрэх нь нүгэл биш. Ахлагч М.Рассэлл Баллард:

“Есүс Христийн Хожмын Үеийн Гэгээнтнүүдийн Сүм ижил хүйстэндээ татагдах байдал олон хүний хувьд ээдрээтэй бодит зүйл байдгийг хүлээн зөвшөөрдөг гэдэг нь тодорхой. Сэтгэл татагдах нь нүгэл биш, харин хүслийнхээ дагуу үйлдэх нь нүгэл мөн. Хэдий хувь хүн ижил хүйстэндээ сэтгэл татагдах эсэхээ өөрөө сонгохгүй ч харин уг мэдрэмжиндээ хэрхэн хариу үйлдэл хийхээ сонгодог. Сүм Бурханы бүх хүүхдийг, тэр дундаа [ижил хүйстэндээ татагддаг хүмүүсийг] хайрлаж, ойлгож ажилладаг” (“The Lord Needs You Now!” Ensign, 2015 оны 9-р сар, 29).

Ижил хүйстэндээ татагдах нь нүгэл биш боловч энэ нь хэцүү түвэгтэй байж болно. Аливаа хүн ийм мэдрэмжтэй байх эсэхээ өөрөө сонгоогүй ч гэсэн Бурханы зарлигуудыг сахих амлалт өгч чадна. Ижил хүйстэндээ татагддаг буюу гомо хүүхдийн эцэг эх нь уг хүүхдээ халамжлах, хайрлах арга замыг сонгох хэрэгтэй. Сүмийн гишүүдийн хувьд бид тэдэнд элэгсэг дотно хандах нь зүйтэй.

“Мөн тэрээр тэднийг бүгд өөрт нь ирж мөн өөрийнх нь сайн сайхныг хүртэхийг урьдаг; . . . түүнд ирэх хэнээс боловч үл татгалздаг; . . . Бурханд бүгд адил” (2 Нифай 26:33).

Бурханы хуулиудын дагуу амьдардаг хүмүүс Сүмд бүрэн оролцоотой байж чадна

“Бурхан бол нүүр тал хардаггүй” (Үйлс 10:34).

Хэрэв бид Бурханы хуулиудад дуулгавартай байвал Тэр бидэнд мөнхийн баяр баясгаланг өгнө гэж амладаг бөгөөд амлалтуудаа үргэлж биелүүлдэг. Ижил хүйстэндээ татагддаг буюу өөрсдийгөө гомо гэж тодорхойлдог хүмүүс Бурханд амлаж, амласнаа дагах бүрэн чадвартай. Тэд Түүний гэрэлд алхаж чадна. Тэд Сүмийн үйл ажиллагаануудад бүрэн дүүрэн оролцож чадна.

“Хэрэв гишүүд ижил хүйстэй хүнд сэтгэл татагддаг боловч ижил хүйстэнтэй бэлгийн харьцаанд ордоггүй бол тэднийг ариун явдлын хуулиар амьдрахаар шийдэж, зөв бус бодол санаагаа хянадаг болоход нь удирдагчид дэмжлэг үзүүлэх хэрэгтэй. Эдгээр гишүүн Сүмийн дуудлага хүлээн авч болно. Хэрэв тэд зохистой бөгөөд бусад бүх талаараа зөв зохистой бол ариун сүмийн бичигтэй байж, ариун сүмийн ёслолуудыг хүлээн авч болно” (*Гарын авлага 2: Сүмийг удирдах нь*, 21.4.6).

Ерөнхийлөгч Гордон Б.Хинкли:

“Бид тэднийг Бурханы хөвгүүд, охидын хувиар хайрладаг. Тэдэнд хянахад хүндрэлтэй, хүчтэй дур хүсэл байж магадгүй. Ихэнх хүн өөр өөр цаг үед ямарваа нэгэн хүсэл сонирхолтой байдаг. Хэрэв тэд тэдгээр сонирхлоо үйлдэл болгохгүй аваас Сүмийн бусад гишүүнтэй адил урагш алхаж чадна. Хэрэв тэд Сүмийн ариун явдлын хууль болон ёс суртахууны жишгүүдийг зөрчих аваас бусдын адил Сүмийн сахилгын арга хэмжээг хүртэх болно” гэж хэлжээ (“What Are People Asking about Us?” 1998 оны 10-р сарын Ерөнхий чуулган).

Аливаа хүний нөхцөл байдал ямар ч бай, тэрээр яг одоо Их Эзэний ажилд хувь нэмэр оруулж чадах бөгөөд итгэлтэй байдал нь Бурханы итгэлтэй хүмүүст амласан адислалуудыг одоо болон хойшид авчирна гэж хүсэн хүлээж болно. Ахлагч Д.Тодд Кристоффэрсон

“Хүн бүрд бэлэг мөн авьяас байдаг. Хүн бүр аль ч цаг үед тэнгэрлэг төлөвлөгөөг биелүүлэхэд хувь нэмрээ оруулж чадна. Сайн бөгөөд амин чухал, яг одоо амин чухал байгаа зүйлүүд нь төгс биш нөхцөл байдалд ч хийгдэж болно. Та нарын олонх нь чадах бүхнээ хийж байгаа. Мөнх бус байдлын хамгийн хүнд бэрхшээлүүдийг даван туулж яваа та бүхнийг хүүхдүүдээ өргөмжлөх зорилготой Бурханы төлөвлөгөөг өмгөөлөн зогсох үед бид бүгд та нарыг дэмжихэд бэлэн байдаг. Есүс Христэд итгэл найдвараа тавьсан хүмүүсийн хувьд Цагаатгал нь шударга бус бүх зүйлийг засах болно гэдгийг бид итгэлтэй гэрчилж байна. Эцэгийн хүүхдүүдээ өгөхөөр бэлтгэсэн бүхнээс багыг хүлээн авахаар сонгогдсон хүн гэж байхгүй” (“Гэрлэж, гэр бүлтэй болох шалтгаан,” 2015 оны 4-р сарын Ерөнхий чуулган).

Ариун явдлын хууль Бурханы бүх хүүхдэд хамаатай

Бэлгийн харьцааны цэвэр ариун байдал нь бидний аз жаргалын төлөөх Бурханы төлөвлөгөөний амин чухал хэсэг юм. Тэргүүн Зөвлөл ба Арванхоёр Төлөөлөгчийн Чуулга

“Адам, Ева хоёрт Бурханы өгсөн анхны зарлиг бол тэд эхнэр нөхрийн хувьд эцэг эх болж чадах боломжийн талаар байлаа. Өдгөө бид Бурханы хүүхдүүдээ өгсөн “өсөн нэмэгдэж, өнөр өтгөн болж, газар дэлхийг дүүргэ” хэмээсэн зарлиг хүчин төгөлдөр байгааг тунхаглаж байна. Түүнчлэн “үр удмаа үлдээх энэхүү нандин хүч нь зөвхөн хууль ёсоор гэрлэсэн эхнэр нөхөр болох эрэгтэй, эмэгтэй хүмүүсийн хооронд байх ёстой” хэмээн Бурхан зарлигласныг тунхаглаж байна” гэж тунхаглажээ (“Гэр бүл: Дэлхий дахинаа өргөх тунхаг”).

Гэрлээгүй эрэгтэй, эмэгтэй хүмүүсийн эсвэл ижил хүйстэн хүмүүсийн хоорондын бэлгийн харьцаа нь Тэнгэр дэх Эцэгийн маань хамгийн чухал хуулиудын нэгийг зөрчиж, бидний мөнхийн өсөлт хөгжилд саад болдог.

“Ариун явдлын тухай Их Эзэний хууль бол хууль ёсны гэрлэлтээс гадуур бэлгийн харьцаанд орохоос татгалзаж, гэрлэлтэндээ үнэнч байх явдал юм. Зөвхөн хууль ёсоор нөхөр, эхнэр болж хуримласан эрэгтэй, эмэгтэй хоёрын хоорондох бэлгийн харьцаа зүй ёсных байдаг. Садар самуун, завхайрал, ижил хүйстний хоорондох бэлгийн харьцаа, түүнчлэн ариун бус, гаж буруу хийгээд зохисгүй үйлдэл нь нүгэл юм” (*Гарын авлага 2: Сүмийг удирдах нь*, 21.4.5).

Бэлгийн чиг хандлагаасаа үл хамааран ариун явдлын хуулийг зөрчсөн хүмүүс наманчлалаар дамжуулан Бурхантай эвлэрүүлэгдэж чадна.

“Чи садар самууныг үйлдэх ёсгүй; мөн садар самууныг үйлддэг, мөн үл наманчилдаг тэрээр зайлуулагдах ёстой. Гэвч садар самууныг үйлдсэн тэрээр мөн бүх зүрх сэтгэлээрээ наманчилж, мөн үүнийг орхиж, тэгээд үүнийг дахиад эс үйлдвээс, чи уучлах ёстой” (Сургаал ба Гэрээ 42:24–25).